

ინტერვიუ საქართველოს გენერალურ პროკურორთან, ბატონ ირაქლი ზოთაძესთან

საქართველოს პროკურატურის ინსტიტუციური რეფორმირება 2013-2020 წლებში

საქართველოს პროკურატურის ინსტიტუციური განვითარების, დამოუკიდებლობის, გამჭვირვალობის და ეფექტიანობის გაზრდის მიზნით 2013-2020 წლებში მრავალი მნიშვნელოვანი რეფორმა განხორციელდა. რეფორმები ეფუძნებოდა ვენეციის კომისიის, ევროპის საბჭოს კორუფციის წინააღმდეგ სახელმწიფოთა ჯგუფის (GRECO) და ეკონომიკური თანამშრომლობისა და განვითარების ორგანიზაციის ანტიკორუფციული ქსელის (OECD ACN) რეკომენდაციებს.

პროკურატურის ინსტიტუციური რეფორმირება სამ ძირითად ეტაპად 2013, 2015 და 2018 წლებში განხორციელდა.

2013 წლამდე საქართველოს პროკურატურა იყო საქართველოს იუსტიციის სამინისტროს სისტემაში შემავალი სახელმწიფო საქვეუწყებო დაწესებულება, რომელსაც ხელმძღვანელობდა საპროკურორო უფლებამოსილებით აღჭურვილი იუსტიციის მინისტრი, მთავარ პროკურორს კი იუსტიციის მინისტრის წარდგინებით თანამდებობაზე ნიშნავდა და ათავისუფლებდა თავდაპირველად საქართველოს პრეზიდენტი, შემდეგ კი საქართველოს პრემიერ-მინისტრი. 2013 წელს განხორციელდა პროკურატურის რეფორმირების პირველი და მნიშვნელოვანი ეტაპი და იუსტიციის მინისტრს, როგორც პოლიტიკური თანამდებობის პირს, სრულად ჩამოერთვა საპროკურორო უფლებამოსილებები.

2015 წელს განხორციელებული პროკურატურის რეფორმირების მეორე ეტაპის ფარგლებში პროკურატურის დამოუკიდებლობისა და გამჭვირვალობის უზრუნველსაყოფად და მისი ფუნქციების ეფექტიანად შესასრულებლად შეიქმნა დამოუკიდებელი კოლეგიური ორგანო – საპროკურორო საბჭო, რომლის ძირითად ფუნქციას წარმოადგენდა მთავარი პროკურორის კანდიდატურის შერჩევა. ასევე შეიქმნა საქართველოს პროკურორთა კონფერენცია – პროკურორთა და პროკურატურის გამომძიებელთა კრება და მის უფლებამოსილებად განისაზღვრა საპროკურორო საბჭოს პროკურორი წევრების არჩევა.

პროკურატურის რეფორმირების მეორე ეტაპზე განსაკუთრებით აღსანიშნავი იყო საქართველოს მთავარი პროკურორის თანამდებობაზე არჩევის და თანამდებობიდან გადაყენების ახალი წესის შექმნა. კანონით განისაზღვრა, რომ მთავარი